

第七八〇册

經濟彙編

祥刑典

赦宥部

(卷)
一七一〇

古今圖書集成

中華書局影印

欽定古今圖書集成經濟彙編祥刑典

第一百七十一卷目錄

赦宥部彙考七

唐肅宗至德二則 乾元二則 上元二則



祥刑典第一百七十一卷

赦宥部彙考七

唐

肅宗至德元年七月即位大赦

按唐書肅宗本紀至德元年七月甲子即皇帝位於靈武尊皇帝曰上皇天帝大赦改元至德賜文武官階勳爵版授侍老太守縣令

按冊府元龜至德元年七月甲子即位於靈武御南門下詔曰朕聞聖人畏天命者奉天時知皇靈眷命不敢違而去之知曆數有歸不獲已而當之在昔帝王靡不由斯而有天下者也乃者羯胡亂常京闕失守天未悔禍羣兇尚扇聖皇久厭天位思傳眇身軍興之初已有成命予恐不德罔敢祗承今羣公卿士食曰孝莫大於繼德功莫大於中興朕所以理兵朔方將殄寇逆務以大者本其孝乎須安兆庶之心敬順羣臣之請乃以七月癸丑朔十二日甲子即皇帝位於靈武崇徽號上尊聖皇曰上皇天帝所司擇日昭告於上帝朕以薄德謬當重任既展承天之禮宜

單率土之澤可大赦天下改元曰至德大辟罪以下常赦所不免者咸赦除之其逆賊李林甫王鉞楊國忠近親合累者不在免限百姓官吏能率親屬去逆歸順者有官加其優獎斬得逆賊父子不問首從當錫茅土別有褒崇其直言極諫才堪收宰文詞博達武藝絕倫孝弟力田沉淪草澤委所在長官聞薦詣闕自陳者亦聽東宮官屬既會昌期合承寵命量加改轉諸色勾微通租懸調及官錢在百姓腹內並宜免放靈州改爲靈武郡大都督府上縣爲望中縣爲上官寮等一切便授天下著壽各賜物五段侍老版授太守縣令有差各賜物五段諸道百姓委本道採訪使差郡縣存問四方將士各賜馬一匹六品以下賜物十段天下寺觀度七人太守並限三考然後轉御史取會任郡縣理人官者後可薦用所有彈奏一依貞觀故事官吏犯枉法贓終身勿齒自古聖帝明王忠臣烈士五獄四瀆名山大川並令所在致祭孝子順孫義夫節婦旌表門閭內外文武官九品以下各賜兩階賜勳兩轉三品以上賜爵一級至德二載十月降劍南囚罪流以下原之十二月戊午大赦

按唐書元宗本紀至德二載十月丁巳皇帝復京師以聞詔降劍南囚罪流以下原之 按肅宗本紀至德二載十二月丙子上皇天帝至自蜀郡戊午大赦靈武元從蜀郡尾從官三品以上予一子官四品以下一子出身瘞陣亡者致祭之給復其家二載免天下租庸來歲三之一

按冊府元龜至德二年十二月戊午御丹鳳樓門下詔曰軒轅有版泉之戰堯帝有丹水之師湯有葛伯不祀周有獫狁孔熾古之王者奉若天命違道不敢不正干紀不得不誅日者逆胡猖狂敢行稱亂朕嗣守鴻業欽承睿圖枕戈嘗膽撫劍泣血罔不夙夜若涉春冰賴天地疾威社稷憑怒上皇丕烈萬國永懷因時致討爲人請命由是義夫奮發回紇籍兵邦圻關輔之士汧隴河湟之衆沙朔羌戎之騎微盧蠻貊之人萬里雲超四方霧合既張我伐咸乃一心蠢茲蜂蠆之餘尚負螳螂之力自京南合戰維北追奔百萬摧鋒一戎而定昔夏以有窮之亂克之者四十年漢以新莽之亂復之者六千日今環周未載氛祲廓清風振海而波盪雷破山而石裂區宇重闢日月增輝此皆三靈叶贊累聖垂祉豈予小子能集大勳頃以先掃宮室奉迎鑾駕紫宸初正黃屋未歸耆老之望則深庭闈之戀猶積所以自天之澤必奉於承顏作解之恩尚稽於候命今六龍屆止萬姓昭蘇本奉親慶深家國不失舊物與俗惟新宜弘肆賞之典共喜以康之福可大赦天下常赦所不免者咸赦除之其逆人能自投降率衆款附反逆殺人并獲逆人其以所部郡縣軍城降者並加超賞應與安祿山同謀反支黨及李林甫王鉞楊國忠等一房並不在免限其赴蜀郡靈武元從官及在路尾從官三品已上與一子官四品已下與一子出身六品已上量與進改功臣將士功業高者別有處分應見任五品已上當別與一品階其陣亡人令所在郡縣收骸骨瘞埋具酒食致祭各與追贈其家給復二載諸郡縣牧或隔絕賊境則困於幽殘或痛宴官軍則弊於賦斂其

來載租庸三分放一其天下百姓應諸色人勾徵及欠負官物一切放免宜令中書門下簡使即分道宣慰所至郡縣審問百姓間利害有須釐革處置者一聞奏其園苑內有閑廐使總監各據所管地界耕種所牧草粟以備國馬其宮女及狗狗雞鵲鵲之類宜即停減屋宇車輿衣服器用並宜准式珠玉寶鈿平脫金泥織成刺繡之類一切禁斷學官即宜精選務令講習簡擇郎官有堪任太守縣令者委京清資五品已上及郎官御史聞薦其郡縣官有灼然清白理行尤異百姓中孝悌力田不求聞達者委採訪使聞奏其有文經邦國學究天人博於經史工於詞賦善於著述精於法理軍謀制勝武藝絕倫並任於所在自舉委郡守鈐擇奏聞不限人數其律令格式未折中者委中書門下簡擇通明識事官兩三人並法官兩三人刪定近日所改百官額及郡名官名一切依故事項以上皇在蜀朕以居岐蜀郡宜改為南京鳳翔宜改為西京西京為中京蜀郡改為成都府鳳翔府尹以下官寮並依三京名號吳山為吳嶽其祠享官屬並准五嶽故事天柱山老君廟改為啓聖宮五品已上清資官及三品已上官上郡太守父見在無官及官卑並與五品官父母先亡歿者贈一人官祖母亡歿亦賜邑號其內外文武官有枉遭逆賊殺害及身赴朝廷并逃難山谷其父子兄弟伯叔等為賊捕捉損害及謀反城人言語洩漏因遭殺戮並勘實聞奏當以追贈天下侍老八十已上版授有差並贈緋魚袋太原久遭逼圍給復三載上黨三度被攻給復五載其南陽潁川靈昌睢陽雍丘等郡縣堅壁

多時力窮方下絕食尚守情亦可矜各給復三年其好時奉仙兩縣進退禦寇徵求復多各給復三載蜀郡上皇親幸萬乘久居明年租賦宜依常式起後載給復三載儀王已下各賜五百匹諸長公主各與一子官嗣王及郡縣王各與一子六品官皇五等已下及九廟子孫及親等人見在者並與轉改內外文武官三品已下各加一階應叙三品五品量加減兩考蜀郡鳳翔扈從從官九品已上賜勳兩轉溥天下賜醢五日
乾元元年二月上上皇冊號大赦四月享太廟祀南郊大赦十月上太子大赦
按唐書肅宗本紀乾元元年二月乙已上上皇天帝冊號曰聖皇天帝丁未大赦改元贈死事及拒偽命者官成都靈州扈從三品以上予一千官五品以上一子出身六品以下叙進之免陷賊州三歲稅賜文武官階爵四月甲寅朝享於太廟有事於南郊乙卯大赦賜文武官階勳爵天下非租庸勿輒役使有能賑貧窮寵以官爵京官九品已上言事二王三恪予一子官十月甲辰立成王儼為皇太子大赦賜文武官階爵五品已上子為父後者勳兩轉舉忠正孝友堪東宮官者
按開府元龜乾元元年二月丁未御丹鳳門大赦詔曰古者父有天下傳歸於子子有天下尊歸於父有國所以繼統立身莫若揚親其義遠矣我太上至道聖皇天帝惟皇降衷敷祐於上允允武乃聖乃神道合乎乾坤德明於日月粵若增崇九廟巡謁五陵天子之孝也嚴禋二郊升中東嶽聖人之表也制禮

作樂闡學明刑帝皇之業也哉定多難懷柔百蠻霸王之功也於是乎為而不宰成而勿居神起象外之光心契合莫之境釋負於小子俾承於不構討伐叛逆綏懷四方豈朕所能皆聖皇之訓也頃者親授寶符載錫美稱顧朕不德以克負荷君父之命若登於天祖宗之緒恐墜於地一昨與羣臣百僚庶尹衆士圖維帝載欽若聖譽自古以來百王垂範文明濬哲孝友寬仁豈有如我開元之盛也乃稽大典上徵號曰大上至道聖皇天帝累日誠請不蒙許納至於數四今茲俯從允膺天休克副人望朕上迫嚴旨曲被殊私迎春之初承奉嘉命聖皇所賜曰光天文武大聖孝感皇帝名以制義亦為實寶卑不踰尊是昭物則恭惟聖造何敢當仁項以鴻業載昌有虧公議伏以大聖二字深僭皇猷讓非飾詞言必形泣承順顏色而宸睠不迴祗膺寵光乃夕惕增厲今惟新景命禮洽於尊親誕受徽章敬在於順上發生萬物行慶其時乎祐兆人綏刑斯在宜弘濡澤以布陽和可大赦天下改至德三年為乾元元年二月五日已前大辟罪無輕重常赦所不免者咸赦除之其兩京文武官應二司先推勘者本罪中遞減等處分其合放者三司具條件奏聞自開元已來將相大臣非反逆及犯名教枉法贓罪者流死許其家人以禮收葬其陷在賊境為其殺戮未經追贈公主并郡王嗣王郡主縣主及皇五等已上親被逆賊殺害者各與子孫一人官使其瘞藏亡失骸骨者各招魂葬身死者三品已上各與追贈仍各與一子官五品已上一子出身六品已下量事追贈其元從聖皇天帝至成都府

文武官五品已上宜與一子官六品已下趙資進改聖望至成都府後到官及寧州靈州首末扈從三品已上與一子官五品已上放一子出身情願迴授周親及親近亦聽六品已下量與改轉鳳翔府以歸順前者普恩外加一階車駕出城後任官潛藏不仕逆賊即與處分唐元功臣普恩外賜爵一級身亡死者子孫一人加一階其諸道節度下將士三品已上與一子官五品已上放一子出身六品已下量與改轉勳業高者各委本使開奏諸道雷後將士普恩外賜恩三轉自開元以來宰輔之家不為逆賊所汙者與子孫一人官賊陷兩京文武常參官及諸道刺史絕貮仰藥不事叛人爲衆所知者量加優贈有脫身賊庭妻子被屠戮者委所司勘會開奏其天下孝義門各與一子官委採訪司具名開奏量文武處分其左降官非反逆緣坐及犯惡逆名教枉法盜賊如有親年八十已上及疾患在牀枕者不堪扶持更無兄弟許其停官終養其流人亦准此自今以後應有以醫術入仕者同明法例處分天下百姓今年租庸並放其百司府縣諸色雜供各宜減半其雜徭役非要切者一切並停其天下州縣有遭逆賊攻擊堅守不下竟以獲全其官人百姓中有識效灼然爲衆所知者宜令本道使案驗奏聞據狀述酬其官賞身亡死者重加褒贈有父母存者仍與一官及邑號無父母者與妻子仍令州縣以官物賑恤并量造舍宇使得安存其州因城陷被賊殺戮殘毀者委本道使勘責取實各量免其二年租賦自逆賊已來有匹夫匹婦節義可稱者並旌表其閭墓其流亡戶復業者委本道

使與刺史勾當賑給并與種子犁牛仍免三年租賦內外文武官三品已上各賜爵一級四品已下及四方通表使各加一階五品已下有父死者各賜勳兩轉其刺史上佐錄事參軍縣令委中書門下逮於諸色人中精加訪擇補擬判司丞已下宜令所緣先於兩京潛藏不仕逆賊及固託疾病官中簡擇資深才堪者銓注續發遣皇五等已上親及九廟子孫有才學政理委宗正寺揀擇聞薦其有任僞官及掌兵馬軍將能即來各還本官仍別優賞其左降官諸色流移配隸安置罰鎮效力之類亡官失爵解退放歸田里及安祿山反黨緣坐不在免限李林甫王鉞楊國忠等一房去年十二月十五日制後所犯並准前制處分四月甲寅親行享廟之禮乙卯御丹鳳門大赦天下詔曰朕聞皇天有命皇王受之命之爲君孝理爲本莫不欽崇前烈事修祿享之儀對越上元式陳郊禋之敬美其盛德商頌有奏鼓之音告厥成功夏書有錫圭之慶國之大事實在於斯間者華胡亂常暴殄天物致圖書禮樂或阻於干戈宗廟神祇有虧於享祀朕誕受明命恭行天罰羣妖克殄計鯨鯢以示威王室既寧奉鑾輿而載復太上聖皇大帝功格天地道通胥庭思凝神於姑射將釋負於宸扆俾予小子繼承大統夙夜祗懼俯盡臣子之心親親尊尊庶極於此是用追崇先后建立中宮末言孝思咸徵音於父母俾行婦道想釐降於虞嬪情理於是獲申人倫以之攸叙然後執瓊清廟歌五聖之重光燿柴圓丘親百神之受職復修祭禮再備樂章尊祖配天不失舊物今大禮斯舉元符允答行慶施惠尚屬

於陽和出繫挺囚必當於時令思與天下更布維新宜覃肆眚之恩以洽雍熙之化可大赦天下除反逆之黨緣坐謀殺十惡劫盜臨監主掌自餘一切原免其餘逆賊元謀及脅從今但歸投並原其罪仍與官賞其成都府元從聖皇功臣及靈武元從功臣並收兩京將士京衛守諸道節度採訪使普恩外三品已上賜爵一級四品已上加一階行人賜勳三轉自寇賊以來官吏百姓中有勞未經酬賞者委所在官長具狀奏聞當與甄錄天下百姓除正租庸外一切不得別有使役如緣軍務所要自令和市兵士有尪羸羸老並揀擇放其長安萬年兩縣各借錢一萬貫每月收利以充和雇勅其別索物及供諸司并蕃客等左藏雖給價值奏請每引時月宜先給兩縣各五十貫貯於兩市差官專知旋還價值其州府縣門夫勳官並於舊額數減一半其庸丁殘疾人等不須更差其州縣官上什物並以公廩及官人料錢依時價和雇造買不得分配典正其年支口味宜減一半諸使應進鷹狗豹貓等一切並停應緣南郊百司張設有損百姓苗稼者委京兆尹隨損多少陪酬所損錢物便即奏聞百姓中有能行仁義分濟貧窮免填溝壑賴救恤者具名開奏當寵以官職錄寡嫠獨疾不能自存及陣亡人家並租免戶州縣隨事優恤賑給百姓中有事親不孝別籍異財點汙風俗虧敗名教先決六十配隸磧西有官品者禁身奏聞京官九品已上許封事極言時政得失朕將親覽用佇嘉謀才有可觀別當甄錄草澤及卑位之間有不求聞達未經推薦者一藝已上恐遺俊又令兵部吏部作徵召

條目奏聞錄事參軍職司糾舉自今已後宜升判司
一政以彰委任國子監學生明經法帖策口試各十
並通四已上進士通三與及第鄉貢明經准常式州
縣學生放歸營農待賦平之後任役常式二王三格
各與一子官內外文武官三品已上賜爵一級四品
已下加一階十月甲辰上御宣政殿開成王爲皇太
子詔曰守器爲重擇賢而立萬國由其末貞百王以
之垂範蓋以重社稷而奉桑盛也朕繼承洪緒惟懷
未圖不膺皇極既符域中之大茂建元儲用崇天下
之本皇太子似植性恭懿因心孝友文武之德克聞
於日躋君親之誠實原於天性往往以時屬艱阻義扶
宗社故能外清元履內復皇圖繇是肇啓承華懋昭
嘉緒今撰辰斯及冊命攸行宜承繼明之慶俾廣游
雷之澤可大赦天下頃者類典大典累洽殊私率土
之間屢經蕩滌猶慮近有冒法或滯徃牢其天下見
禁囚徒已下罪一切放免內外文武官三品已上者
賜爵一級四品已上各加一階五品已上官子爲父
後者賜勳兩轉頃因國用不足頒賜未周今所鑄新
錢數盈於萬其京官文武五品已上及常參官六軍
將士東京北畱守及諸道節度將士等各賜有差其
唐元功臣成都元從及朕元從功臣等普恩之外更
賜一爵四品已下更加兩階其在靈州及寧州至鳳
翔者仰所司類例更遞加一等皇親及諸色陪位人
各賜勳兩轉其鴻臚蕃客賜絹一千匹天下義夫節
婦孝子順孫旌表門閭終身不仕京官五品已上各
舉忠正孝友文儒周慎堪任東宮官者務取實才不
得虛薦今餘寇未殄有脅在賊中未歸順者一切不

以爲罪其有受賊節制能以兵降者酬其封爵且爲
政之要求賢是急比令中外薦舉多非實才所以詢
事考言登科蓋猶慮品穴之內尚有沉淪宜令所
在州縣更加搜擇其懷才抱器隱遁丘園以禮徵送
如或不赴具以名聞凡與前詔科目相當一切委內
外文武五品已上官有所知者不限人數任各薦聞
如自舉者亦聽於所在投狀有堪任用不限常資其
行人家及羸老單貧寡寡惻獨已頻有處分宜令州
縣長官倍加優恤應元冊禮職掌要重者及撰冊書
昇寶官禮官等普恩之外賜勳兩轉其禮儀使特賜
一階副使普恩之外賜爵一級勅文有不該者所司
類例奏聞

乾元二年三月丁亥以旱降死罪流以下原之流民
還者給復三年

按唐書肅宗本紀云云

按冊府元龜乾元二年二月壬戌帝遣侍中苗晉卿
中書侍郎王琬分錄大理寺御史臺京兆府見禁囚
徒已下罪皆免之三月丁亥詔曰古之哲王臨御區
夏莫不好生慎罰以理人命故易稱緩死書貴恤刑
所以樂時布和奉天育物者也朕恭守丕緒祗膺皇
極順時調氣庶欽若於元樞肝食宵衣每憂勳於黃
屋頃自獻春之後膏液稍憊言念人時或稽政本雖
離畢之應未獲滂沱而滋萌之漸亦頻露沐是用申
茲渥澤助彼發生宜崇寬大之典俾達陽和之氣其
天下應合死罪特降從流以下罪放免其事緣反
逆造偽頭首情狀難容者所司詳議聞奏其流移左
降該恩合量移者宜令所司即類例處分朕爲人父

母義當亭育時有或慙於令物有不遂其生敢懷自
逸之至實受在予之責但以兇徒尚阻戎旅多虞致
使黎庶不堪徭役未息雖國家之事休戚當同而君
父之誠寧忘愧慙况春農在候田事方興百姓之間
固須優恤天下州縣應欠租庸課稅傳馬粟貸糧種
子糶糴變稅及營田少作諸色勾徵納未足者一切
放免其正義等倉及諸色攤徵亦宜准此其至德二
載十二月三十日已前和糶和市并負欠官物及諸
色官錢欠利常平義倉欠負五色一切放免州縣百
姓頃屬軍興戶口之間不無流散宜令州縣長官審
加勘責且立簿書據見在戶徵課稅其逃亡者別立
文案設法招輯終年類例以爲褒貶如勘責虛望所
由官長並節級科貶其所縣典正等先決六十仍罰
効力其百姓先逃散即能還者並每季申省給復三
年其逃戶有田宅邸店堪充課稅者宜令所縣即爲
租賃不得因茲妄有欺隱主到即却令分付比者不
急之務尋已詔停如聞所司未全減省載求人瘼實
切朕懷固當革弊息人勵精爲理自今已後內外不
得輒別徵求妄爲進奉諸色力役造作非軍國灼然
要急及諸色率稅亦一切並停太常寺音聲除禮用
雅樂外並教坊音聲人等並仰所司疎理使敦生業
非祠祭大祀及宴蕃客更不得輒有追呼其內將作
少監及諸供司工匠等各仰長官逐要量留餘者並
委御史臺專加糾察如有違犯具錄奏彈宣示中外
令知朕意

上元元年三月丙子降死罪流以下原之閏四月已
卯大赦改元賜文武官爵

按唐書肅宗本紀云云

按開府元龜乾元三年三月丙子詔曰國之用刑兼在於慎恤王者布澤亦貴於乘時所以大易陳規必議於獄周官設教遵於中典朕躬臨實位憂念黎元乾乾之心日慎一日况兵戎未息征役尤繁哀此下人無忘夕惕如聞州縣之內多有累囚囹圄之間動淹時序每軫納隍之慮常懷解網之仁屬陽春布和品彙咸達宜覃在宥之澤俾叶生成之化其天下見禁囚徒死罪降流已下一切放免其十惡反逆及偽造頭首強盜劫殺官吏犯賊枉法等害政既甚在法難容不在此限其諸供司及作曹非切要外並宜減省京畿諸色和糴一切並停其天下百姓灼然單貧交不存者緣租庸先立限長行每鄉量降十丁猶恐漏戶之中懸罄者衆限數既少或未優於其實不支濟者宜令每鄉量更矜放待資產稍成任依常式以天下未寧頻申赦令公私庶務優恤蓋多載軍有過之恩庶及措刑之美宣示中外知朕意焉閏四月己卯御鳴鳳門詔曰自古哲王恭承景命莫不執象以御宇歷時以建元必當上立乾符下立人極者也朕承累聖之鴻業紹大中之寶位胡孽千紀王師尚勞乾乾之心豈忘鑒寐一物失所每軫納隍之憂萬邦未寧深懷馭朽之懼賴上元垂福宗廟降靈百辟卿士同心戮力方冀千戈載戢區宇乂寧每勵躬於帝圖常取則於天道屬天人叶紀景象垂文爰遵革故之典將契維新之命義存更始庶有應於天心澤被無私宜載覃於率土可大赦天下改乾元三年爲上元元年閏四月十九日昧爽已前大辟罪已下已

發覺未發覺已結正未結正見禁囚徒罪無輕重常赦不免者咸赦除之其與逆賊元謀及脅從受驅使懼法來降及潛藏不出者已頻處分但能歸順赦罪除元惡之外一無所問其史思明心能改圖束手來款亦當洗其瑕釁議以勳封內外文武官賜爵各有差其六軍及飛龍閑廐加賜物其成都靈武元從扈從遞加有差在外諸軍各加錄賞物陣亡將士優加褒贈行人家口所在賑給定禍亂者必先於武德拯生靈者諒在於師員周武創業克寧區夏惟師尚父實佐興王況德有可師義當崇累積諸古昔爰崇典禮其太公望可追封爲武成王有司依文宣王置廟仍委中書門下擇古今名將配享並置亞聖及十哲等享祭之典一同文宣自古百王欽慎刑法蓋以法者人之命刑者國之權苟或失其科條固難措其手足頃或奸臣擅命典不修造大吏便行哀矜何在自今已後其有犯極刑者宜令本司依舊三覆庶平反之際人謂不冤幽明之間理皆無謬又書稱羣聖咸集詩曰祀事孔明爰自遐代尤崇祭祀朕深惟古義必在至誠苟德之不修則神亦無據故知精誠有感黍稷非馨而况朱瑋發言固三從而可驗漢文深戒爲千載之明徵事可遵行理當變革有司所立祕祝之法或移於歲或移於人君人之心寧所忍也自今已後削去此法其中祀下祀并雜祭祀等一切並停其諸應合祭祀列於常典所用祭科一依古制務從減省以副朕心又車服以庸有虞盛典威儀以等周禮舊章往屬承平多歷年所至於公卿列位中外在官多以奢僭爲心流弊成俗宜令所司定王公以下

車服產業各詳古制及令式作節限聞奏自頃戎車未息殘孽猶虞軍史獻功務陳首級且四海之內孰非王人豈以苟從昏迷陷在夷貊一朝授首懸彼桑街朕志在好生憫其驅留其諸軍所獲首級除元惡之外一切不得傳送又設官以體本在安人遞遷之政勢於利物今寰瀛之內兵革未清加以時或不登物皆踴貴軍儲是急庫稍靡供冗官之流固甚勞弊其京閑司官等有材堪釐務者宜令中書門下即類例量資歷出授外官王者設教擇賢以理廣徵嚴穴用副新標宜令中外五品已上文武正員官各舉賢良方正直言極諫一人武藝文才俱堪濟理者亦任狀舉其或文之詞策武非騎射但權謀可以集事材力可以臨戎方圓可收亦任通舉並限制到一月內奏舉自古明王聖帝名山大川並委州縣長吏擇日致祭義夫節婦孝子順孫旌表門閭終身勿事上元二年正月甲寅降死罪流以下原之九月壬寅大赦去乾元大聖光天文武孝威號去上元號稱元年以十一月爲歲首月以斗所建辰爲名

按唐書肅宗本紀云云

按開府元龜上元二年正月甲寅詔曰乘時布澤有國之彝訓議獄緩刑前王之茂典繇是洽其靡卵殷湯弘解網之仁順彼陽和漢后有錄囚之詔育物施惠抑惟舊章朕續服鴻業祗膺寶位何嘗不日旰忘食中夜求衣慮一物之失所憂四方之未乂雖身居黃屋而志在蒼生今寇孽爲虞征輸未息猶恐提戈釋耒未有厚於人時冀棘理梧或慮盈於幽囹屬三陽啓候萬物遂生宜覃在宥之澤庶叶維新之令其

天下見禁徒囚死罪降流徒以下並釋放京城宜令中書門下即分往府縣御史臺大理寺即自親按問疏決訖具狀聞奏諸府州各委所繇長官准此處分諸色流人及左降官等所繇類例並與量移仍委中書門下議覆奏取處分其先緣安祿山僞署二司有名應在流貶者原情議罪負國誠深朕以捨其殊死竄於荒微固當與衆共棄長爲匪人然皆邦國舊臣嘗挂纓冕使其終沒裔土未匿慚魂孰若貸以殊私俾令効節亦准例處分兼委中書門下量輕重類例奏取處分比緣寇盜之內干戈舊從白刃臨頸胡寧忍決所以陷於兇黨荷免者多前從詔書類以該及其史思明將士及僞署官屬等有東身歸順并率衆來降官爵如初一無所問以城邑降者仍別加封爵餘兇黨之流亦同此例天實臨照朕無食言王者設教務農爲首今土膏方起田事將興敦本勸人實惟政要宜令天下刺史縣令各於所部親勸農桑百姓中有勤勞耕耘積其菽粟或贍於閭里或能益軍儲委所繇長吏具狀奏聞當特與甄賞仍令有司第其高下量酬五品已下官員其百司及州縣興工力役不急之務一切並停諸軍兵健應在行營有羸老疾病不任戰陣者各委節度使速揀擇放還路次州縣量加濟卹諸色步役各令所司減省放其營農且寇孽未平軍戎當備屯庶之內征賦猶繁朕所以親帥公卿躬行節儉而詔書屢下獨免蓋多國計軍儲取給而已猶欲累加損益以惠黔黎宜委中書門下勾當今度支使與諸供司一切減省應可獨免每司各條件聞奏當使施行九月壬寅詔曰爲人上者與衆

守邦自古哲王懼其滿假聰明潛哲罔不在躬文武聖神乃以爲號顧予非薄運屬經綸一旅成師復其舊物聖皇納人壽域游意道源神器之重傳歸於朕獲守丕業若履春冰敢忘謙冲日益招損欲垂範而自我亦未華而就實其乾元大聖光天文武孝感等尊崇之稱何德以當之以欽若昊天定時成歲春秋五始義在體元惟以紀年更無潤色至於漢武飭以浮華非昔王之茂典豈求代而爲則三代受命正朔皆殊宗周之王實得天統陽生元氣之本律首黃鍾之尊制度可行叶用斯在自今已後朕號稱皇帝其年但號元年去上元之號其以今年十一月爲天歲首便建丑建寅每月以所建爲數承天降后稽古臨人心繇革故之源方合大中之道風行寓縣澤被無涯欽承上帝之心申錫蒼生之慶可大赦天下自二年九月二十一日昧爽已前大辟罪無輕重已發覺未發覺已結正未結正見繫囚徒常赦所不免者咸赦除之其十惡五逆及造僞頭首官典犯賊法實難容刑故無小並不在免限其史朝義若能翻然改圖背逆歸順罪無所問加以勳封自乾元元年已前開元已來應及逆連累赦應節度限所未該及者並宜釋放有官者降資與官無官者依本色例收叙內外官三品以上賜爵一級四品五品各加一階六品已下賜勳兩轉成都府及靈武元從普恩之外三品已下更賜爵一級四品更加一階六品已下更賜勳一轉眷及勤勞俾其焯叙每以田功在謹農事惟勤不有司存何成軍穀諸州等各量司田叅軍一人專主農事每縣各置田正二人於當縣揀明閑田種者允

務令勸課國之大事郊祀爲先貴其至誠不美多品黍稷雖設猶或非馨牲牢空多未謂能享今以元元乎祐至道爲心將臻太和不欲多殺禮樂殊制孝敬懷明德之聲庶合西鄰之祭唐虞之代肇有九州王者所都文無異制其京兆府河南府太原府三京之號宜停其鳳翔先爲西京亦宜准此所設諫曹欲聞諷諭九副從繩之望須成削棄之書其諫官令每月一上封事指陳時政得失若不舉職事當別有處分其諸州別駕可依舊却置每除京官五品已上正員清望官及郎官御史諸州刺史皆用推薦一兩人以自代仍具錄行能聞奏觀其所舉以行殿最文武官等賜物各有差自今已後有隱欺須勾剝者宜勾當年若事連去年亦任通勾其隔年者不在勾限官典隱藏在腹內不在此限其氏姓雖得之久遠者與俗諱及隱疾同聲者宜改與本族望所出大姓自逐穩便名山大川明王聖帝所在廟祠各委州縣官長虔誠致祭天下侍老先服授者改與服授未服授者與服授授寡寡獨不能存立者委刺史縣令量加賑恤義夫節婦孝子順孫旌表門閭終身勿事故書有所未及者各令有司速勘會類例條件聞奏寶應元年建卯月大赦建辰月大赦建巳月大赦五月大赦十一月免爲賊脅從者罪按唐書肅宗本紀寶應元年建卯月辛亥大赦賜文武官階爵五品以上清望及郎官御史薦流人有行業情可矜者停賞鷹鷄狗豹建辰月壬午大赦官吏聽納賊免罪左降官及流人罰銀効力者還之建巳

月乙丑皇太子監國大赦改元年為寶應元年 按
代宗本紀寶應元年四月己巳即皇帝位五月丁酉
大赦刺史予一子官賜文武官階爵子為父後者勳
一轉免民逋租宿負

按開府元龜寶應元年建卯月辛亥朔御丹鳳門詔
曰惟天為大事之在明惟聖能享承之在德朕託於
人上獲守丕圖思大道之行去鴻名之節文武徽號
存而不稱開統履端建元叶紀美皆有讓言必可陳
虔告元元致齋清廟恭行舊典展禮南郊百神允懷
上帝臨我升聞之際其亦可言昭事以誠實膺多福
高而不遠復見其心乃候發生之時用行勸勸之道
陽谷出日登大明於域中泰山起雲遍膏雨於天下
君人臨照德澤周洽布其寬大豈止於茲宜行肆眚
之恩益廣萬邦之慶可大赦天下自元年建卯月一
日昧爽已前大辟罪已下罪無輕重已發覺未發覺
已結正未結正繫囚見徒常赦所不免者咸赦除之
其反逆造偽頭首謀殺故殺并十惡死罪官吏及典
正犯賊為盜既深在法難容並不在赦限其史朝義
已下脅從將士及受僞官等棄逆歸順因事立功封
賞之外餘無所問其諸邑流人及左降官等前後頻
有處分並與量移所繇稽運動歷年數宜令有司即
申明前後制勅節文速勘責類例開奏其中外行業
夙著情狀可矜久踐朝班曾經任用者委在朝五品
已上清望官及郎官御史於流貶人中素相諳委為
衆所推者各以名薦須當才實其内外文武官三品
已上賜爵一級四品已上各加一階成都府靈武元
從功臣三品已上更賜爵一級四品已上更加一階

朕敬授人時慎徵月令庶無極否以獲休徵自今以
後每至四五月迎氣之日與百辟卿士舉而行之建
辰月應蕃張騎宜三分量留一分其餘即放歸營農
至建巳月任依舊式諸州刺史縣令及司田參軍令
設法勸課令其耕種不得失時貧不支濟戶仍方圓
處置量事借貸務令存立歲終巡按量其功效便申
賞罰諸道貢賦除馬畜供軍之外其餘鷹鷄狗豹奇
禽異獸並不得輒進五都之號其來自久宜以京兆
府為上都河南府為東都鳳翔府為西都江陵府為
南都太原府為北都孝奉天經禮崇國典橫於四海
漏及三泉其京資清正員文官五品已上武官三品
已上并兩省供奉官御史諸州刺史並諸道節度已
下三品已上父母亡歿未經追贈者並量與追贈文
武不墜道弘於人務在搜揚俾其展效其諸道人中
有詞學高深兼通政理軍謀制勝明習韜鈴者委所
在刺史揀擇薦京四品已上員文武官任各舉一人
孝子順孫義夫節婦旌表門閭終身勿事建辰月壬
午詔曰元首之義以人為心外有凋傷內懷慘怛罪
歸於己情見乎辭伯禹深泣辜之仁漢皇下哀痛之
詔與理同道惟刑是恤朕志弘覆載運屬艱難思措
大刑俾登壽域風以解愠時當發生國有舊章已懸
書於象魏恩成在有宜釋繫於狴牢其天下見禁囚
徒罪無輕重一切放免其官典犯賊情雖難恕特從
寬典許以自新並宜納贓放所犯罪左降官等即與
量移近處諸邑流人及効力罰鎮人等並即放還其
有亡官失爵亦與收叙比來兵革不息年穀未登百
姓流離至於困弊戰士暴露頗聞闕之或先有結聚

及有違軍令但宜改過自效前事捨而不論艱虞以
來多冒刑憲道有善貸屢有德音庶其最靈咸自改
勵宣示中外知朕意焉己未又詔曰左降收叙官及
流人等今月三日已有處分若准例更待本處文解
必恐動經歲年恩不及時殊乖先意宜令所繇計會
勘責五品已上及郎官御史俱貶中書門下六品已
下委兵吏部各詳犯狀輕重量才改轉其本犯非巨
蠹曾經清班名行夙著者仰具名銜聞奏諸邑流人
等所司簡勘明曆牒所繇州縣軍鎮等放還流貶人
所在身亡者任其親故收以歸葬仍州縣量給棺槨
發遣四月乙丑詔曰上天降寶獻自楚州神明告曆
數之符合璧定妖災之氣總集瑞命祇承鴻休因以
體元叶乎五紀其元年宜改為寶應元年建巳月改
為四月其餘月並為常數仍舊以正月一日為歲首
受茲福應行以升平因日月之重光布雲雨之渥澤
其天下見禁囚徒罪無輕重并已發覺未發覺已結
正未結正四月十五日昧爽以前一切放免左降官
宜即量移近處流人一切放過有司更不得輒有類
例條件其楚州刺史并出寶縣官及進寶官量與進
改隨進寶官典儀等各量與一子官宣示中外宜知
朕意己巳代王即位五月丁酉帝御丹鳳樓門下大
赦天下制曰高宗嗣興諒閣成受終之禮康王承統
翌日奉顧命之書凡萬事尚殷蕭牆有憂蒼生佇望
社稷謀安教雖達於邇喪禮有變於金革順人聽政
侃侃從權朕頃從鑒與率彼西夏佐成草昧俾掌戎
車國步艱難磨圖廣運再清寓縣崇復宗社稟承命
以受律敢貪天以為功聖慈弘深開踐明兩奉承庭

訓敢有怠違嗚呼不弔昊天殃咎薦至皇祖之哀未釋閔凶之罰奄鍾攀號罔極若無天地誓終喪紀企及前王百辟抑予俾恭遺訓俯遂衆望嗣膺丕烈欽茲大寶懼不勝任若蹈春冰如集喬木日者先聖哀損朕在問安而閱牆構災凌長成禍閭閻作孽闔寺滔天職爲亂階潛置巫蠱將以翳弄覆我邦家賴良弼翊戴爪牙同德天道助順神理害盈昭此共工之心終貽管蔡之辱舍彼有罪咸伏其辜廢於離宮實於城穎今天衢雖泰率土未康式協公卿之心仰遵易月之命奉時斯在先甲未孚宜允人神覃茲漫汗可大赦天下自寶應元年五月十九日昧爽已前大辟罪已下已發覺未發覺已結正未結正繫囚見徒常赦所不免者罪無輕重咸赦除之自開元以來所有諸色犯累者並宜雪免左降官并諸色流人及罰鎮效配軍團人等一切卽放還其中有見任刺史縣令及正員者并依本任其四月十五日已後諸色流貶者與量移近處逆賊史朝義已下有能投降及率衆歸附者當超與封賞天下禁囚不得過五日所有推劾不得分外拷掠亦不得信友證便結罪名諸色文武官應在凌宵門內謁見者并飛龍射生等並宜以寶應功臣爲名諸州刺史與一子官刺史縣令入五品減兩考內外文武官三品已上賜爵一級四品已下各加一階諸州刺史父母在無官者與致仕官及無諡號已亡歿者追贈諸州防禦使並停天下子爲父後者各賜勳一轉州縣官自今已後宜令三考一替大官饗膳等特宜減省有涉奢侈一切宜停天下百姓逋租應調貨糧種子諸色欠負官物一切放

免開元乾元等錢並宜准一文用不須計以虛數益昌郡王邈進封鄭王延慶郡王迺進封韓王故庶人皇后王氏故庶人太子瑛鄂王瑤光王琚宜並復封號棟王琰永王璘及應安祿山誣誤人反狀人等並宜昭雪建昌王追封爲濟王崇恩王追封爲衛王靈昌王追封爲鄆王其有明於政理博綜典墳文可經邦謀能制勝及孝悌力田諸州刺史並宜搜揚聞薦投匭者不須勘以停處姓名務招直言以副朕意十一月辛巳詔東都河北應受賊脅從署僞官并僞出身悉原其罪一切不問

欽定古今圖書集成經濟彙編祥刑典

第一百七十二卷目錄

赦宥部彙考八

唐代宗廣德二則 永泰一則 大曆九則 德宗建中二則 興元一則 貞元六則 順宗永貞一則 憲宗元和八則

祥刑典第一百七十二卷

赦宥部彙考八

唐

代宗廣德元年七月壬子大赦改元免民逋負戶三丁免其一庸調給復河北三年回紇行營所經免今歲租賜內外官階勳爵給功臣鐵券藏名於太廟圖形於凌煙閣

按唐書代宗本紀云云

按開府元龜廣德元年七月壬子御宣政殿下詔曰

惟高祖太宗敷大德於天下覆載之內湛恩茂育累聖同道用康兆人寶位重光深其德澤被服漸漬洽於生靈者百有五十年之間兵不作而刑將措矣自寇虐橫厲山東不開釁起渠魁毒流區宇三軍七萃之士豪傑忠良之徒制在風波遭其驅劫絲是干戈不息征賦實煩哀我人斯並罹災患憫茲有犯無罪萬方朕上載皇天下臨黔首奉先聖之成命集一切之大勳元惡既誅羣生思父是欲鏡清六合網決八紘庶齊大道之時克復太平之理至化猶鬱兵嚴初

解百辟卿士中外衆臣並進昌言請上徽號曰寶應元聖文武孝皇帝朕涉道日寡慚德良多恐阻樂推之心自增神器之重俯應典冊敬受鴻名便欲謁報昊天展事郊廟又以孟秋多稼垂及西成王畿之間人實勞止輟茲大禮式候元冬切爲踰年改元之制繼承洪業敢廢舊章博採羣公之義乃貞協用之紀其寶應二年改爲廣德元年爰屬履端乃弘肆責救茲湯火俾雲行而雨施滌其瑕穢將玉振而金聲宜廣更始之恩用明嚮勸之福可大赦天下自廣德元年七月十一日昧爽已前大辟罪無輕重已發覺未發覺已結正未結正繫囚見徒常赦所不免者咸赦除之左降官卽量移近處亡官失爵各與收敘諸色流人罰鎮効力安置配隸等一切放還其安祿山史朝義親族應在諸道一切原免並無所問天下所有諸色結聚羌渾黨項等但能悔過自陳各歸生業一切並赦其罪其中有頭首能勸率井束手來歸者井加官賞仍令本道防禦使井本管刺史縣令分明曉諭所有到者各具名錄奏請百姓逋租懸調及一切欠負官物等自寶應元年十二月三十日已前並放免一戶之中有三丁放一丁庸調地稅依舊每畝稅二升天下男子宜二十五成丁五十五入老應徵租稅刺史縣令據見在戶徵科其逃亡死絕者不得虛攤鄰保河北百姓復三年應是回紇行營經歷處免今年租稅內外文武三品已上賜爵一級四品已上加一階仍各賜兩轉寃難已來將相勳業高者以名藏太廟畫像於凌煙之閣儀王及彭王已下男未官者并准舊例與官及封永穆井長樂已下長公主及

郡縣主嗣王郡王等各與一子官皇親五等已上諸親三等已上各與一子出身二王後各與一子官諸道節度觀察使立功將士其父兄在無官者依子文武與官已歿者追贈陣亡將士襲父官爵河北河南有懷材抱器安身守節素在丘園不仕爲衆所知委所在長官具名開薦應授僞官等并已昭洗矜才有過宜有甄收委所繇勸本官各銜資歷聞奏量才處分文武正員常參官并諸州刺史父母無色號官者宜與致仕官及邑號贈者更與改贈刺史縣令自今已後改轉刺史三年爲限縣令四年爲限員外及攝試官一切不得釐務諫官每月上封事無所迴避河南河北僞度僧尼道士女冠並與正度天下刑獄須大理正斷刑部詳覆不得中書門下卽便處分諸色人中有孝弟力田經術通博文詞雅麗政理優長本州各以名薦

廣德二年二月乙亥有事於南郊己丑大赦賜內外官階爵武德功臣子孫予一人官成都靈武元從三品已上加賜爵一級餘加一階寶應功臣三品已上官一子仍賜爵一級餘加階勳兩轉五品已上爲父後者勳兩轉

按唐書代宗本紀云云

按開府元龜廣德二年二月戊子御丹鳳門下詔大赦天下制曰惟我高祖太宗之有邦罔不昭事於上帝嚴恭敬畏與神合符七聖在天眷命永固朕嗣守鴻業敢忘先尚質誠事修盛典項以四方多難責在朕躬六侯行師日不暇給東擒羯胡之首西禦犬戎之患元元告病社稷危內定外攘不遑展禮

雖高明未達而精意惟勤克通至誠以錫純嘏蕃戎即叙弓矢載櫜虔奉泰壇鑒接神祇之顧末保宗社歲時結霜露之思近又百辟在庭儼然而進奉請元子以居少陽冊命乃行七咍攸主按風雨之清道乘星火之仲春朝於元元格於藝祖躬執珪瓚祇見南郊天何言哉神所勞矣敷兆人之猷穀廣四達之聰明式重燔柴之經益申解網之惠可大赦天下自廣德二年二月二十一日昧爽已前大辟罪無輕重已發覺未發覺已結正未結正繫囚見徒常赦所不免者咸赦除之左降官即與量移近處亡官失爵放歸不齒之類并官已復資未得本階者各量與收叙諸色流人及量移人并罰鎮効力配隸等一切放還自兇孽亂常王室多故干戈不息今已十年軍國務繁關輔九劇念茲疲耗久困徵科其京城諸司諸使應配驛騎官散官諸色丁匠幕士供膳音聲人執祭齋郎問事掌閑師并諸司門僕京兆府騎丁屯丁及諸色納資人每月總八萬四千五十八人數內每月共支二千九百四十四人令河東關內諸州府配不得偏出京兆府餘八萬一千一百一十四人并停所須衛役使宜樽節定數官給資錢不得干擾百姓其實應元年十二月三十日已前諸色逋欠在百姓腹內者并放免天下戶口宜委刺史縣令據見在實戶量貧富作等第差科不得依舊籍帳據其虛額攤及鄰保其天下諸州府長史及縣令有清白著聞善政稱最能招輯逃亡編附復業戶口增多者具狀聞奏朕當差人按覆與所舉狀同者超資進改天下所有諸色結聚及羌渾黨項等能悔過自陳各歸生業

一切并捨其罪其中有能率先來降者仍特加官賞征人不怠勤戍斯久丁壯疲弊老弱困窮光武有言頭鬚為白戢藏鋒刃牧養元元方面重臣宜悉朕意應諸州團練將士等委本道節度及諸防禦使等審與州府商議如地非要害無所防禦其團練人等並放營農休息寇戎以來積有年歲徵求數廣凋弊轉深自今已後除正租稅及正勅并度支符外餘一切不在徵科限內外文武官三品已上賜爵一級四品已下各加一階仍並賜勳兩轉武德元從功臣勳業特崇子孫沉翳者委所司勘責各與一人官成都靈武元從普恩之外三品已上更賜一級四品已下更加一階寶應功臣普恩之外三品已上各與一子六品官賜爵一級四品已下各加兩階更賜勳兩轉五品已上官子為父後者賜勳兩轉副元帥光弼子儀各與一子三品官并諸諸道節度使各一子五品官并階都防禦使及經略等使各與一子六品官并階去歲行幸陝州六軍英武威遠威實應射生衛前射生左右步軍等并內外文武百官扈從到行在者三品已上與一子官四品已上各加兩階自陝州至上都已來置頓使及州府長官普恩之外各與一子出身置頓使判官已下緣路縣令及專知置頓官各加一階其六軍神策寶應射生衛前射生及左右步軍英武威遠威武等諸軍左右金吾將士綠大禮扈從及在城雷從者共賜錢五萬貫鴻臚蕃客共賜錢一千貫儀王及彭王已下諸王男未有官者並准舊例與官其已封為郡王國公者及永穆長樂已下長公主及諸郡縣主并嗣王郡王各與一子官皇親五

等已上諸親三等已下各與一子出身二王之後各與一子官臺省之官事資履歷刺史縣令任在親人職務所更是為理本其左右丞侍郎御史中丞等取曾任刺史者郎官亦取曾任縣令者并所選御史亦宜於錄事參軍縣令中簡擇仍須資歷稍深者其有官非累歷才行特堪任用者自布衣已下任所在聞薦委中書門下尚書省考試堪任者不在此限尚書省政理所繫左右綱轄攸歸比來百司職事皆廢宜令明徵式令舉所職百官有論時政得失並任指陳事實具狀進封必宜切直無諱有司白身人亦宜准此任詣監使進表朕將親覽必加擇用朕每思素儉以敦淳風必約嚴章以齊侈俗其珠玉器玩寶鈿繡等一切禁斷諸攝官頻有處分一切盡停尚聞因循其弊未革即宜申明舊勅勒停三年之喪謂之達禮自非金革不可從權其文官自今已後并許終制一切不得輒有奏請緣大禮應升壇殿行事者普恩之外更與一子應在太清宮郊廟諸色職掌者及冊皇太子行事官撰開并書文及簡較造冊官普恩之外三品已上賜爵一級四品已下加一階仍賜勳一轉天下耆老九十已上版授刺史七十已上版授上佐縣令孝子順孫義夫節婦旌表門閭終身勿事五嶽四瀆各山大川今古聖帝明王忠臣義士宜令所管致祭

末泰元年正月癸巳大赦改元
按唐書代宗本紀云云
按開府元龜末泰元年正月癸巳朔御含元殿大赦天下制曰協五紀者建號以體元受四時者布和而

順氣天心可見人欲是從爰立大中之道式受惟新之命朕嗣膺下武獲主多方顧以薄德乘茲難運式臆問罪今已十年飲至策勳雖凶渠之授首勞師黷武豈人主之用心况乃軍役屢興干戈靡定茫茫士庶斃於鋒鏑噫皇穹以朕爲子蒼生以朕爲父至德不能以被物精誠不能以動天俾我生靈擠於溝壑非朕之咎誰之過歟朕所以馭朽懸旌坐而待曙勞懷罪己之念延想安人之策亦惟羣公卿士百辟庶寮咸聽朕命叶宣乃力務履清白之道還典淳素之風率是黎元歸於仁壽君臣一德何以尚之迺者刑政不修惠化未洽既盡財力良多抵犯靜惟哀救實軫於懷今將大振維綱益明德勸舉改元之典弘敷在宥之澤可大赦天下改廣德三年爲末泰元年自末泰元年正月一日昧爽已前大辟已下罪無輕重已發覺未發覺已結正未結正繫囚見徒常赦所不免者咸赦除之僕固懷恩戰伐有功討謀任重不終臣節輒肆奸兇妄誘異蕃同爲不軌朕惟務責己情重舊勳如能翻然來歸必從寬宥其下偏裨等因被驅率不獲已者所在山谷草竊反側未安者如能束手而來一切並無所問自廣德元年已前天下百姓所欠負官物一切放免在官典腹內者不在免限其百姓除正租庸外不得更別有科率刺史縣令與朕分憂彫瘵之人切須撫字一夫不獲情甚綽隍有能招輯逃亡平均賦稅增多戶口廣闊田疇清節有聞課效尤著者宜委所在節度觀察具名聞奏即各按覆超資擢授其有理無能政迹涉賊私必當重加貶奪未爲殿累農政本也食人天也方春之首重干

東作除軍興至急餘一切並停令百姓專營農事其逃戶復業及浮客情願編附者仰州縣長吏親就存撫特令賦役全不濟者量貸種子務令安集孝悌力田懷才抱器遺逸未經薦達者各委州府聞奏親當策試量能叙用應自立仗諸軍將士等宜共賜錢五萬貫書稱成秩詩美懷柔仰惟衆靈念茲多祐其五嶽四瀆名山大川宜令所管牧宰精誠致祭中外寮吏各揚其職無使曠官克副朕意
大曆元年十一月甲子大赦改元給復流民歸業者三年
按唐書代宗本紀云云

按開府元龜大曆元年十一月甲子日長至制曰王者欽若昊天誕受丕命莫不協五紀而乘運稽三微而體元上齊璿衡下立人極乃頒曆於惟歲更覃恩於率土朕嗣守鴻基恭臨寶位頃以時當寇難運屬干戈誓衆典師爲人除害實賴宗社降福寰宇小康用典淳朴之風庶洽雍熙之化乾坤敷祐大庇生靈文武協心同力王室豈朕薄德而臻於此乃者金革所聚綿歷歲時征賦煩繁人猶凋瘵是用疚心疾首當寧而興懷罪以在予馭朽而貽懼每思弘濟之道用拯黎元之斃月躔星昂律中黃鍾合天正之符承日至之末祥雲在囑既當伯趙之司惠澤布和宜順一陽之氣建元發號革故維新俾及履長之節用深行慶之典可大赦天下其末泰二年宜改爲大曆元年自大曆元年十一月十二日昧爽已前大辟罪已下已發覺未發覺已結正未結正繫囚見徒罪無輕重常赦所不免者咸赦除之長吏犯賊不在免限夫

從簡之道大易至言薄賦之規前王令範朕志遵儉約務欲息人徵斂無期誠爲勞弊天下百姓除正租庸及軍器所須外不承正勅一切不得輒有科率國以人爲本人以農爲業頃緣師旅征稅殷繁編戶流離田疇荒廢未言牧宰政切親人其刺史縣令宜以招輯戶口墾田多少用爲殿最每年終委本道按察使節度等使案覆聞奏如課績尤異當加超擢或正理無聞必置科貶逃亡失業流徙無依特宜招撫使安鄉井其逃戶復業者宜給復三年如百姓先貨賣田宅盡者宜委州縣取逃死戶口田宅量丁口充給仍仰縣令親至鄉村安存處置務從樂業以贖資糧王畿之間賦斂尤重百役供億當甚艱辛哀我疲人良多憫念盡徹之稅著自周經未便於人何必行古其什一稅宜停周徵俊造漢辟賢良垂之典謀求代作則天下有安貧樂道孝悌力田未經薦用者委所在長官具以名聞奏朕當親自策試量才叙用其立仗將士等宜賜物五萬疋五嶽四瀆名山大川祀典攸存禋祀昭著宜以禮致祭
大曆四年七月癸未降死罪流以下原之
按唐書代宗本紀云云

按開府元龜大曆四年七月癸未詔曰至禮之代先德後刑上歡心以臨下下欣然以奉上禍亂不作法令何施去聖久遠薄於教化簡書填委獄訟繁興苛吏舞文寬人致辟思欲制心改行厥路無繇豈天地父母慈愛之意也朕主三靈之重託羣后之上夕惕若厲不敢荒寧內訪卿士外咨方岳日不暇給八年於茲而大道淳風鬱而不振四郊多壘連歲備邊師

旅在外役費尤廣賦輿轉輸疲耗吾人困竭無聊窮斯濫矣下庶闇昧不見刑網戎士在軍未習法令犯禁抵罪其徒實繁狴牢之間未詳事實吏議不次動淹時序傷阻和氣數彰咎徵此皆朕之不明教之未至上失其道而繩下以刑敢不罪己以答災眚且人者君之支體害之則君有傷刑者教之輔助失之則人無所措慮有冤濫慘然憂傷用明慎罰之典俾弘在宥之澤其天下見禁囚死罪降徒流已下罪釋放其左降官及流人移隸等並與量移仍爲所司即勘責送名中書門下奏聽進止如聞州縣官比來率意恣行粗杖不依格令致死殞斃深可哀傷頻有處分仍聞乖越自今已後非灼然蠹害者不得輒加非理仍委觀察節度使嚴加捉搦勿令有犯錄名聞奏宣示中外宜悉朕懷

大曆五年三月丙戌以昭陵皇堂有光赦京兆關輔六月己未以彗星減降死罪流以下原之

按唐書代宗本紀云云

按開府元龜大曆五年三月丙戌制曰古者以季春之月布德行惠恤刑振乏朕親執犧牲玉帛獲率於上帝神祇九年於茲矣克己思理明不能燭昆夷未叙王略猶虞歲暮三秦之師日有千金之費悉索敝賦疲於餽軍侯甸之間徵求耗竭百穀翔貴關中小歉窮則斯濫安能懼刑困而成盜多有犯法至於軍戎之士致使廩賜不充因之逃亡或抵邦憲事非獲已情亦可察近以露濡之恩明發有懷屬禁火之令節方薦鮪於園寢聖祖敷祐景靈告祥先天後天載荷嘉貺以陰以雨又助發生固宜順曲成之仁布惟

新之命赦罪有物曠然滌除其京兆府及三輔并京城內諸司諸使見禁囚犯死罪已下特宜釋放其有犯未發覺者罪無輕重一切放免如妄有論告以其罪罪之官典犯賊不在免限六月已來以彗星始減赦下制曰惟辟奉天作人父母若天垂戒於上人不安於下則修德勤政以達至誠恤刑獄之冤滯問閭之疾苦招納諫諍方求良弼允迪前烈率繇茲道朕獲承宗廟之重託於王侯之上夙夜齋懷莫敢荒寧推誠以撫萬邦屈己以安百姓憂勤之志日慎一日服御之給損之又損而涉道猶淺燭理不明國經王度多有廢闕加以寇戎聚犯軍國煩勞賦重人竭因之歲歉田荒業廢通散相仍每深怵悼頻有蠲除兼亦簡求良吏以惠於人除去姦兇用達幽枉大變風俗更張刑政冀人和之漸洽荷天膏之累彰固以朕德之寡昧化之衰薄其咎不遠在予一人亦繇郡邑之政未盡條理或貪以害物或擾以傷農有陵弱暴寡之冤有不均失中之政人無所措多陷刑辟蓋上之教導未至豈忍以文法繩之慘然憂嗟深自隱惡雖靡草麥秋之後方斷薄刑而南風長養之時宜寬庶獄大決疏網與之更新其天下見禁囚徒死罪並降徒流流已下並釋放內外文武官及前資官六品已下并草澤中有碩學專門茂才異等智謀經武諷諫主文者仰所在州府觀察牧宰精求表薦如其中搜揚未盡遺逸林閭者即宜詣關自舉親當策試量能擢用朕覽漢文詔書至陽和之時草木羣生之類皆有以自樂而吾百姓或陷於死亡而莫之省緬然遐想感歎增懷哀今之人又甚於昔思有贍恤俾

安其居觀察節度使及刺史各宜訓勵所部使奉科條變貪官之節激循吏之行其清白明著政理殊尤者具以名聞必加獎擢若冒干貨賄紊我紀綱切宜糾按當峻刑憲其官人犯賊經恩免罪者並宜申報中書門下及所司不得容其抑止自王室多故積有歲時皆我文武之臣中外戮力今天下既定崇德報功與之剖符傳代不絕至於蒞官任職各宜明慎典刑宜慶子孫永以爲戒於戲武德貞觀之間有若魏徵王珪李靖李勣房元齡杜如晦等扶翼大運勤勞王家尊主庇人匪躬致命咸有一德格於皇天緬然長懷風烈猶在其後嗣沉翳特加優獎如廟宇荒毀即宜修葺無德不報何日忘之其有繆寡俾獨老幼貧窮不能自存者委州府縣長吏取諸色官量事賑給仍仰招攜戶口勸課農桑應所在州府首與工役處非灼然急切者宜並停五嶽四瀆名山大川神明所居風雨是主宜委中書門下分使致祭以達精誠孝子順孫義夫節婦事迹明著者特加旌表頒示中外知朕意焉

大曆七年五月乙未以旱大赦減膳撤樂

按唐書代宗本紀云云

按開府元龜大曆七年五月己未制曰濟於道者化醇而刑措善於理者綱舉而網疏朕涉道未弘燭理多昧嘗亦遐想太古高揖元風保合太和在有天下蓋德薄而未臻也是用因時以設教便俗以立防務盡平恕用申哀恤又教淺而多犯也加以邊虞未戢并賦猶繁荒廢之餘寇攘斯起遂令園土嘉石之下積有累囚危章牙簡之中困於法吏屬盛陽之候大

暑方恭永念往何堪鬱灼所以沮傷和氣感致咎徵天道人事豈相遠也如聞天下諸州自春已來或愆時雨首種不入宿麥未登哀我於人何恃不恐皆由朕過益用懼焉惕然憂嘆深自咎責所以減膳別居齋宮禱於神明冀獲嘉應仲夏之月靜事無刑以助晏陰以弘長養斷薄決小已過於麥秋繼長增高宜順乎天意可大赦天下其大曆七年五月十五日昧爽已前已發覺未發覺已結正未結正應天下見禁囚徒罪無輕重一切並宜放免所在不須類例聞奏宜令諸道節度觀察及州牧縣宰等於當管內所有名山靈迹各精誠致祭祈降甘露冀獲豐稔永思流弊庶振風猷其巴南諸州仍歲水旱迫於凍餒或至流離因有剽求苟全性命懼刑網之所及姑哨聚以相依抑有繇焉蓋非獲已永言其弊用軫於懷如能相率來歸各安生業並無所問咸許自新宣示中外咸使知悉

大曆八年五月壬辰赦京師癸卯降死罪流以下原之

按唐書代宗本紀云云
按開府元龜大曆八年五月壬辰曲赦京城內見禁囚徒並放釋是月癸卯制曰自古帝王順時行令當北至之炎燠應南風之長巖必事無刑解網申恩叙麥秋之氣而代天理物矣朕獲奉珪璧虔恭郊廟一紀有餘承累聖之鴻業為兆人之父母戰戰兢兢恐不克濟而天地幽贊陰陽化育關輔之內農祥薦臻嘉穀豐衍宿麥滋殖閭閻之間倉庾皆實百價低賤實曰小康此皆上帝報貺烈祖儲祉卿士存誠黎元

盡力之效思與萬方百辟咸共樂之而未能也况或抵常憲然就拘辦對官曹幽閉獄戶未惟械繫之慘迫復冒犯之繇皆自王化之未醇風教之多闕俾民忘恥格俗虧禮讓陷在刑典久於狴牢當順陽助生之時積冤蔽感傷之氣百姓有過在予一人顧誕欽恤誠切傷痛用申在宥之旨庶洽惟新之令自大曆八年五月二十五日昧爽已前天下繫囚見徒及已發覺未發覺已結正未結正死罪並降徒流以下罪並宜放免敢以赦前事相宣告者以其罪罪之亡命山澤挾藏軍器百日不首復罪如初夫承天之叙則三時有成自中形外則四海蒙福嗟爾庶士諒悉予懷

加優賞其陣亡將士仰本路隨事優恤妻子各申錫賚其百姓錄寡孤獨不能自存者困窮無主誠可哀傷仰所在州府長官每事以諸色官物量加贍恤令其得所亡命山澤挾藏軍器百日不首復罪如初在宥之典既周動植純嘏之錫庶延子孫凡在品彙各宜遷善宣示中外諒悉朕懷十二月壬辰敕京城內見禁囚犯死罪從流流已下罪釋放
大曆十年九月壬寅降京師死罪流以下原之
按唐書代宗本紀云云
大曆十二年六月丁未以旱降京師死罪流以下原之

按唐書代宗本紀云云

按開府元龜大曆九年四月壬辰制曰朕誕膺天命以撫方夏兢兢多惕保祐惟人懼庶獄之未孚俾一夫之不獲思用哀恤與之和寧頃屬夷夏多虞干戈是務徵賦頗重黎元不康內迫艱窮外乘師旅因行盜竊自陷典刑累然園土之下佇勦視陰之命未念愚惑惻焉疚心而寰宇之間舉類斯衆今火中惟夏長羸及時鬱然沈繫致傷和氣萬方有罪在予一人將洽至淳之化更布惟新之理其大曆九年四月二十四日昧爽已前大辟罪已下已發覺未發覺已結正未結正罪無輕重一切並宜放免敢以赦前事相宣告者以其罪罪之其在軍將士有刀箭所傷入要沈疾者戮力疆場致身鋒刃各委所繇量給藥物厚

按唐書代宗本紀云云
按開府元龜大曆十二年六月丁未以旱故詔曰頃屬煩暑差候悠陽積愆處於高明之中猶有鬱蒸之歎而况幽閉獄戶辨對官曹俯臨秋期將正時憲重修欽恤之道載弘全省之仁其京城見禁囚犯流已下罪並宜釋放
大曆十四年六月大赦
按唐書德宗本紀大曆十四年五月癸亥即皇帝位六月己亥大赦

按開府元龜德宗以大曆十四年五月癸亥即位六月己亥朔御丹鳳樓大赦天下自大曆十四年六月一日已前罪無輕重常赦所不原者咸赦除之寶應元年已後痕累禁錮及反逆緣坐等一切洗滌內外文武官三品已上賜爵一級四品已下加一階致仕官同見任天下百姓為戶者賜占爵一級內外將相及方面連帥尚父子儀李正己李寶臣李忠臣朱泚

崔祐甫崔寧李勉李叔明張獻恭梁崇義張延賞投秀實陳少游田悅張伯儀朱滔李抱真李希烈馬燧崔昭薛邕李道昌李國清吳仲孫李昌夔李固清李元忠郭昕孟暉馬崇福李芄康澤姚明敷杜祐及李忠誠嚴郢趙惠伯并劉晏侯希逸顏真卿路嗣恭王駕鶴等其正己爲司徒兼太子太保寶臣爲司空兼太子太傅崔寧李勉各以本官同平章事餘並加官及勳封等其乘輿服御量加減省務敦素質天下進獻事緣郊祀陵廟所須依前勿闕餘並撙節歸於省約士庶自艱難已來田宅踰制車服奢侈仰所司詳前後格式明立法度王公百官既處崇班宜知廉慎如省坊市之內置邸鋪鬻與人爭利並禁斷仍委御史臺及京兆尹糾察諸州府祥瑞珍禽異獸鷹犬之類奇器異服錦繡珠玉等並不得輒有進獻諸軍州有與戎狄接壤各守邊疆勿更掩襲無備仍即差使臣宣諭共崇和好諸州刺史上佐自今已後准式入計叔祖頡王已下叔彭王已下弟蜀王已下大長公主長公主各與一子京官郡縣主嗣王郡王各與一子出身二王三恪褒聖侯各與一子官在城諸軍將士各賜緋帛武德已來宰臣功臣名迹崇高并至德已來將相功効明著已亡歿者量加贈諡于孫沉翳者量與官諸州刺史及常參官父見在未有官者量與五品致仕官及階父母歿與贈官及邑號天下諸使及州府有須改革處置事一切先申尚書省委僕射已下衆官商量聞奏外使及州府不得輒有奏請或律令格式條目有未折衷者委中書門下簡擇理議通明官共刪定自至德已來制勅或因人奏請或

臨事頒行差互不同使人疑惑中書門下與刪定官詳決取堪久長行用者編入條格三司使准式以御史中丞中書舍人給事中各一人爲之每日於朝堂受詞推勘處分憲官諫官常參官每政事錯綜仰面折廷爭無有所隱憲司彈奏一依貞觀故事其知匭使先有明勅非不丁寧猶聞壅遏自今已後仰每日諸匭務招遠方達聰明目諸司各舉厥職共守至公天下有才業尤著高蹈丘園及直言極諫之士所在具以名聞其諸色人中有孝悌力田經學優深文詞清麗軍謀宏遠武藝殊倫者亦具以名聞能詣闕自陳者亦聽仍限今年十二月內到朕當親試自今已後更不得令置寺觀及請度人存問者老恤孤弱不能自存者
德宗建中元年正月辛未有事於南郊大赦賜文武官階勳爵遣黜陟使於天下賜子爲父後者勳兩轉按唐書德宗本紀云云
按開府元龜建中元年正月辛巳有事於南郊還御丹鳳樓大赦天下自正月五日已前大辟罪已下咸赦除之內外交官賜爵及階勳諸道宜分遣黜陟使觀風俗問疾苦自艱難已來徵賦名目繁雜委黜陟使與諸道觀察使刺史作年支兩稅徵納比來新舊徵科色目一切停罷兩稅外輒別率一錢四等官准擅與賦以枉法論其軍府支計等數准大曆十四年八月七日勅處分九廟子孫非五等新任用始封王廢不限年代東官官宜擇端厚之士皇太子時幸大學行齒胄之禮諫議大夫孔述睿宜充太子侍讀公卿諸儒議定五經博士其常參官及節度觀察防

禦軍使都知兵馬使刺史少尹赤縣及大理司置評事授詔三日內於四方館上表讓一人自代其外官與長吏附中書門下每官闕以舉多者授之王府六品已下官及諸州縣有可併省及諸官要罷減者量事廢省天下子爲父後者賜勳兩轉
建中三年二月甲戌赦吏民爲李惟岳迫脅者
按唐書德宗本紀云云
興元元年正月大赦七月大赦
按唐書德宗本紀興元元年正月癸酉大赦改元去聖神文武號復李希烈田悅王武俊李納官爵赴奉天收京城將士有罪減三等子孫減二等在行營者賜勳五轉賜文武官階勳爵罷間架竹木茶漆稅及除陌錢給復奉天五年城中十年七月辛卯大赦賜百官將士階勳爵收京城者升八資給復京兆府一年
按開府元龜興元元年正月癸酉朔帝在奉天行宮受朝賀畢大赦天下制曰致理興化必在推誠忘己濟人不吝改過朕嗣服不構君臨萬邦失守宗祧越在草莽不念率德誠莫追於既往未言思咎期有復於將來明徵其義以示天下小子懼德不嗣罔敢怠荒然以長於深宮之中暗於經國之務積習易溺居安忘危不知稼穡之艱難不恤征伐之勞苦澤靡下究情未上通事既壅隔人懷疑阻猶未省己遂與興戎徵師四方轉餉千里賦車籍馬遠近騷然行齋居送衆庶勞止或一日屢交鋒刃或連年不解甲冑祀奠之主室家靡依死生流離怨氣凝結力役不息田萊多荒暴令峻於誅求疲吐空於杆軸轉死溝壑離

去鄉閭邑里丘墟人煙斷絕天譴於上而朕不瘡人怨於下而朕不知遂致亂階徧行都邑賊臣乘輿肆逆滔天曾莫知愧敢行陵逼萬品失序九廟震驚上累於祖宗下負於蒸庶痛心視貌罪實在予永言愧悚若墜淵谷賴天地降祐神祇叶謀將相竭誠爪牙宣力羣盜斯屏皇維載張將弘永圖必布新令朕最與夕惕惟念前非乃者公卿百寮用加虛美以聖神文武之號被蒙闇寡昧之躬固辭不獲俯遂羣議昨因內省良所瞿然體陰陽不測之謂神與天地合德之謂聖豈伊淺劣所敢當仁文者所以化成武者所以定亂朕自臨御於茲六載化之不被亂用是典豈可苟徇羣情猥當徽號重予不德益用懷慚自今已後中外所上書奏不得更言聖神文武之號今上元統歷獻歲發祥宜革紀年之號式敷在宥之澤與人更始以答天休可大赦天下改建中五年為興元元年自正月一日昧爽已前大辟罪已下咸赦除之李希烈田悅王武俊李納等有以忠勞任膺將相有以勳舊繼守藩維朕撫取乖方誠信未著致使疑懼不自保安失於懷柔黷此威武皆由上失其道而下罹其災朕實不君人則何罪屈己弘物予無愛焉庶懷引愚之誠以洽好生之德其希烈武俊田悅李納并所管將吏一切並與洗滌復其爵位待之如初仍即遣使分道宣諭朱滔雖緣朱泚連坐路遠必不同謀朕念其舊勳務在弘貸如能效順亦與惟新朱泚大為不道棄義絕恩反易天常盜竊名器暴犯陵寢所不忍言獲罪祖宗朕不敢赦其應被朱泚脅從將吏百姓等或遭扇誘或迫兇威苟能自新理可矜宥但

官軍未到京城已前去逆效順并散歸本軍者并從赦例原免降官及已經量移并與量移近處流人配隸及罰鎮効力並安置及得罪人家口未許歸者一切放還先有痕累禁錮反逆緣坐承前恩赦不該者並宜洗雪亡官失爵放歸勿齒量加收叙未復資者更與進叙諸色降黜配隸人中有才能者特加錄用諸軍諸道應赴奉天并進收京城將士並賜名奉天定難功臣身有過犯遞減罪三等子孫有犯減罪二等諸道將士在行營並超三等改官仍各賜勳五轉在本鎮者依資與改官各賜勳三轉內外文武官三品已上賜爵一級四品已下者加一階仍並賜勳兩轉應因流貶身死未葬並許其家各據本官以禮改葬其所加墊陌錢稅間架竹木柴漆權鐵之類悉宜停罷其奉天升為赤縣仍給復五年在縣城內者給復十年天下有隱居行義晦迹丘園委長吏具名聞奏當備禮邀致諸邑人中有賢良方正能直言極諫并博通墳典達於教化識洞輅略堪任將帥者委常參官及長吏奏聞諸道貢獻自非供宗廟軍國之用一切並停赦書既下人心大悅七月辛卯御丹鳳樓大赦天下詔曰國家百七十載八聖儲慶敷祐下人視之如傷懼天理未嘗不既富而教既教而懲有誼辜有過之惠無作威逞欲之事俾爾萬姓嗣續迄今俾予一人纂承及此朕恭膺顧命獲主大寶懽於理亂之本溺於因習之安上下各隔賞罰乖舛執法以濟眾而犯令愈甚典戒以除害而長亂益繁中心浩然罔知攸濟姑務勢力曾微省躬殫財以竭人略內以勤遠中外耗蠹遐邇震駭賊臣蓄奸承釁竊

發九廟乏祀兆人靡依猥猥肆其吞噬豺狼擾於宮闕去歲云半再罹播遷茫茫中原罔有定極烈士殞命暴骸於草野黔首遭難轉死於溝壑朕實獲戾人其何辜悼心慙顏泣血思咎敢憚實越以幸於厥躬誠懼重辱祖宗益縱兇醜忍恥誓志庶復寇讎賴吳穹降威式沮亂命將帥戮力恭行天誅士庶宅心不忘先德賜予寡昧再受多祐紐紱綱於既紊復天柱於將傾言旋鑄京不改舊物宗祧以序朝享有期明發不寐彌增感惕嗚呼君者所以撫人也君苟失位人將安仰朕受天明命臨御萬方違道任情致寇典禍生靈無告受制兇威苟全性命急何能擇或虧廢名節或貪冒貨利陷於法紀事匪一端究本原情諒非獲已不能撫之以道而又繩之以刑豈朕恤人罪己之誠含垢布和之義滌清汚俗與物更新可大赦天下自興元元年七月二十日昧爽已前大辟罪已下咸赦除之今年五月已前左降官與量移內外文武及致仕官三品已上賜爵一級四品已下加一階仍並賜勳兩轉司徒兼中書令最與一子五品正員京官侍中城與一子六品正員京官駱元光尚可孤韓遊瓌戴休顏各與一子七品正員官諸道節度使及行在都知兵馬使都虞候扈從左右金吾六軍大將軍各與一子八品正員官都團練使觀察使各與一子官收京城將士超八資改轉已既叙者更與超二資扈從及收京城將士及常參官祖父母在先無官封量授致仕官及邑號已亡者與追贈扈從將士三品已上賜爵二級四品已下各加兩階賜勳三轉諸州刺史普恩之外賜爵一級四品已下加一階賜